

- Mentes regine stupefecerunt sine fine.
 'Actenus in mundo rumor tuus', inquit eundo,
 'Quidquid clamavit, vix te mihi dimidiavit.
 135 Fama minor vero de tali personat hero'.
 Absistant fraudes, cantabo tuas ego laudes,
 Canto, cantavi, cantabo poemate suavi:
 Te non obstrusa modio recolet mea Musa.
 Sollennis passim vehor aura in eam michi classim.
 140 Corde potenter amo, que metri scemate clamo.
 Nam si fas esset, ut dissimulatio cesset,
 Annos presentes evitarem quasi sentes,
 In medio quorum vix est memor ullus honorum.
 Sevi, districti, tristes sunt et maledicti.
 145 Regnat ubique dolus: tu pene places michi solus.
 Bis duo fluxerunt, que dudum secla fuerunt:
 Sortis honor quinte totus stat et integer in te.
 Sed quid si canto diffusius hec aliquanto?
 Secula Saturni veteres cecinere coturni,
 150 Quando verecundus pulcro stetit ordine mundus.
 Liber tam morbis quam criminibus fuit orbis,
 Libera peccatis placuit via simplicitatis.
 Aureus ille status, ter dico quaterque beatus.
 Nemo sicofanta turbabat gaudia tanta.
 155 Jam tunc nullus egens, nullus soli sibi degens,
 Cuique fides et amor, nusquam fraus, jurgia, clamor.
 Procedente mora succedunt deteriora,
 Vivens argentum status est et vita sequentum.
 Ceperunt flecti paulisper ab ordine recti,
 160 Corda tument fastu, verum confunditur astu.
 Cepit tedere quosdam sacra jura tenere.
 Mentes corruptas dominandi prima voluptas
 Nequiter invasit, et federa rumpere suasit.
 Simplicitas premitur, rerum dolus arce potitur.
 165 Sed necdum talis fuit impietas generalis:
 De multis aliquos corruptio fecit iniquos,
 Et vulgo gentes in simplicitate manentes,
 Sunt tanquam bruti dominantia frena secuti.
 Post intervallum subiens ex ere metallum
 170 Fuscavit mores, vitiavit mentis honores.
 Materies clare ceperunt degenerare.
 Ex tunc paulatim, non primo tempore statim,
 Induit ipsa malam mentem gens impia palam.
 Prodiit infido baratri de fonte cupido,
 175 Triste secuta scelus; clamores, jurgia, zelus
 Convaluere brevi pro sanctis legibus ævi.